

皇清經解續編卷六百四十六

南菁書院

國語發正十八

錢唐汪遠孫小米著

楚語下

在男曰覲在女曰巫解覲見鬼者也周禮男亦曰巫

周禮家宗人疏云男子陽有兩稱名巫名覲女子陰不變直名巫無覲稱說文巫部覲能齊肅事神明者在男曰覲在女曰巫从巫見此用楚語文也

屏攝之位解昭謂屏屏風也攝形如今要扇皆所以明尊卑爲祭祀之位近漢亦然

儀禮覲禮注依如今綈素屏風也 內傳昭十八年疏引鄭

眾云攝攝束茅以爲屏蔽檀弓注髮以布衣木如攝與疏云

攝是漢時之扇淮南汜論訓注云翬狀如今要扇畫文插置棺車箱以爲飾

於是乎有天地神民類物之官是謂五官

內傳昭二十九年五行之官是謂五官實列受氏姓封爲上公祀爲貴神木正曰句芒火正曰祝融金正曰蓐收水正曰玄冥土正曰后土春秋繁露五行相生篇司馬者火司營者土司徒者金司寇者水司農者木管子五行篇昔黃帝作立五行以正天時五官以正人位竝與此五官同韋不解五官之義故特明之

故神降之嘉生解嘉生善物

應劭曰嘉穀也

見史記麻書注漢書郊祀志注

及少皞之衰也九黎亂德解少皞黃帝之子金天氏也九黎黎

氏九人蚩尤之徒也

蚩尤之徒也五字各本皆脫据書呂刑疏引補

漢書律厯志少昊帝考德曰少昊曰清清者黃帝之子清陽也是其子孫名摯立土生金故爲金德天下號曰金天氏据此清陽已稱少昊及摯有天下始有金天氏之稱摯是清陽之後非黃帝親子也韋注似未明晰易繫辭疏引世紀謂少昊黃帝之子名摯字青陽蓋沿王符五德志之誤

書呂刑馬融注蚩尤少昊之末九黎君名

見釋文

某氏傳九黎

之君號曰蚩尤高誘注戰國秦策呂氏春秋蕩兵篇竝同案蚩尤當炎帝之末九黎值少皞之衰年代曠隔安得合爲一人鄭玄注呂刑云學蚩尤爲此者九黎之君在少昊之代也

見書疏

正本國語爲說韋云蚩尤之徒或亦與鄭同耳

民瀆齊盟解齊同也

內傳成十六年瀆齊盟杜注云不詳事神

命火正黎司地以屬民解唐尙書云火當爲北北陰位也周禮則司徒掌土地民人者也

書堯典疏引鄭志荅趙商云先師以來皆云火當爲北黎爲

北正

亦見詩檜譜疏

臣瓚注漢書以火爲北之誤竝與唐解同中論

厯數篇引此文作北正直改字矣史記厯書集解引應劭曰

黎陰官也火數二二地數也故火正司地以屬萬民應不改

字

其後三苗復九黎之德解其後高辛氏之季年三苗九黎之後

高辛氏衰三苗爲亂行其凶德如九黎之爲也堯興而誅之

鄭注書呂刑云顓頊代少昊誅九黎分流其子孫居於西裔

者爲三苗至高辛之衰又復九黎之惡堯興又誅之

見書疏及禮記

緇衣

此韋解所本後漢書西羌傳言三苗姜姓之別書疏引

韋昭云三苗炎帝之後諸侯其工也案堯典叙三苗流其工
自是兩事其謬初不待辨孔疏所引非國語注亦不知見何
書也

程伯休父

解程國伯爵休父名也

未

下

知

何

見

何

書

也

何

詩常武疏云父宜是字而昭以爲名未能審之案應劭注漢

書司馬遷傳休甫字也

天子舉以大牢

解

大牢牛羊豕也

一

牢

牛

羊

豕

也

何

周禮宰夫注云三牲牛羊豕具爲一牢

郊禘不過繭栗

解

角如繭栗郊禘祭天也

禘字從公序本

漢書郊祀志天地牲角繭栗顏注云牛角之形或如繭或如栗言其小後漢書趙熹傳熹年未二十既引見更始笑曰繭栗犢豈能負重致遠乎

芻豢幾何解草養曰芻穀養曰豢

禮記月令注養牛羊曰芻犬豕曰豢說文芻以芻莖養牛也

莖當依文選注引作莖

引春秋國語曰芻豢幾何豢以穀圈養豕也墨

子天志上篇莫不芻牛羊豢犬彘絜爲粢盛酒醴以祭祀上帝鬼神芻正字芻假借字趙岐孟子注亦云草食曰芻穀養

曰豢

日月會于龍虬龍龍尾也謂周十二月夏十月日月合辰於尾上月令孟冬日在尾

文選東京賦注引賈逵曰虬龍尾也月令孟冬日在尾韋注本賈 嘉定錢氏大昕曰東京賦虬與疾協韻未得其義後

讀廣韻四覺犯訓龍尾又與豚同乃晤虬爲犯之譌廣雅云

豚臂也故龍尾亦有龍犯之稱犯从豕聲古音如篤

玉篇犯丁角切

故轉爲鬪音東方朔傳鶴俛啄與竇轂爲韻易良馬逐釋文

有胃音是其證也

潛研堂文集三十五

羣神頻行解頻竝也言竝行欲求食也

說文讐匹也廣雅頻比也頻與讐同匹比皆有竝義故韋訓

爲竝也

帥其子姓解子姓眾同姓也

儀禮特牲饋食禮子姓兄弟鄭注云所祭者之子孫言子姓者子之所生

天子禘郊祀之事必自射其牲

周官射人祭祀則贊射牲鄭注云烝嘗之禮有射矢者賈疏云鄭據逸烝嘗禮而知又司弓矢凡祭祀其射牲之弓矢鄭注云射牲示親殺也

王后必自春其粢解粢器實也

穀梁傳文十三年禮宗廟之事君親割夫人親春又桓十四年甸粟而內之三宮三宮米而藏之御廩

地事文解地質柔順故文易曰坤爲文

坤爲文易說卦文九家注云萬物相襍故爲文也白虎通義三正篇天爲質地受而化之養而成之故爲文

所謂百姓千品萬官億醜兆民經入咳數者

風俗通義曰十十謂之百十百謂之千十千謂之萬十萬謂

之億十億謂之兆十兆謂之經十經謂之垓

太平御覽
工藝部七

官有十醜爲億醜解醜類也以十醜承萬爲十萬十萬曰億古數也今以萬萬爲億

書洛誥孔傳十萬爲億詩伐檀傳萬萬曰億

楚茨豐
年傳同

箋云十

萬曰億正義云萬萬曰億今數然也傳以時事言之故今九章算術皆以萬萬爲億箋以詩書古人之言故合古數言之知古億十萬者以田方百里於今數爲九百萬畝而王制云

方百里爲田九十億畝是億爲十萬也故彼注云億今十萬
是以今曉古也徐岳數術紀遺黃帝爲法數有十等及其
用也乃有三焉十等者億兆京垓秭壤溝澗正載三等者上
中下也其下數者十十變之若言十萬曰億十億曰兆十兆
曰京也中數者萬萬變之若言萬萬曰億萬億曰兆萬兆曰
京也上數者數窮則變若言萬萬曰億億億曰兆兆兆曰京
也

令尹問蓄聚積實解實材也

內傳文十八年聚斂積實不知紀極杜注與韋同晉語韓宣
子憂貧曰吾有卿之名而無其實韋注亦云實材也

公馬足以稱賦解公馬公之戎馬

周官馭夫分公馬而駕治之鄭注云乘調六種之馬

糗一筐解糗寒粥也

周官漿人鄭注云涼今寒粥若糗飯襍水也

至于今令尹秩之

周官注無令尹二字

解秩常也

秩常爾雅釋詁文周官酒正凡有秩酒者以書契授之鄭司農注云秩常也常受酒者引此傳文王制九十日有秩內則大夫無秩膳鄭注竝云秩常也

四境盈壘解壘壁也言壘壁盈滿四境之內

禮記曲禮四郊多壘此卿大夫之辱也鄭注云辱其謀人之

國不能安也壘軍壁也數見侵伐則多壘

又有藪曰雲連徒洲解楚有雲夢藪澤名也連屬也水中可居

者曰洲徒其名也

段氏尚書譌異曰雲連徒洲卽雲土也亦作雲杜

漢書地理志江夏有

雲杜縣

此如穀於菟之類皆方俗語言徒土杜一字也雲土長

言之爲雲連徒洲猶恂督二字荀卿書則曰備猶督儒雲夢

夢地名沈括夢溪筆談舊尚書云雲夢土作乂唐太宗時得

古本作雲土夢作乂詔改從古本可證雲夢爲兩地又左傳

定四年楚子涉睢濟江入于雲中宣四年邳夫人使棄諸夢

中昭三年王以田江南之夢雲夢兩地故圍單稱雲若一地

豈可單稱雲乎韋此注及杜注左傳皆似混雲夢爲一雲在

江北夢在江南

詳見嘉定王氏鳴盛尚書後案三

珠足以禦火災解珠水精故以禦火災

乘麟六經之思

說文珠蚌之陰精引春秋國語曰珠以禦火災是也大戴禮
勸學篇珠者陰之陽也故勝火

管子侈
靡篇同

孔氏廣森補注曰珠

稟於月爲陰其光爲陽

惠王以梁與魯陽文子解文子平王之孫司馬子期子魯陽公
也

淮南覽冥訓注魯陽楚之縣公楚平王之孫司馬子期之子
今南陽魯陽是也漢書地理志南陽郡魯陽古魯縣御龍氏
所遷 墨子魯陽文君疑卽魯陽文子也與墨翟同時人

見耕

柱魯問
兩篇

沈諸梁解沈諸梁楚左司馬沈尹戌之子葉公子高

呂覽慎行篇注沈尹戌莊王之孫沈諸梁葉公子高之父也

通志氏族略引風俗通云楚沈尹戌生諸梁食采於葉因氏
焉潛夫論云左司馬戌者莊王之曾孫也葉公諸梁戌之第
三弟也所傳聞異辭

展而不信解展誠也誠謂復言而非信之道

逸周書寶典解展允于信又大匡篇昭信非展孔晁注曰展
似信而非

毅而不勇解毅果也

左傳穀敵爲果致果爲毅爾雅果毅勝也

其心又狷而不絜解狷者直己之志不從人也

廣雅釋詁一下猥急也王氏疏證云狷與猥字異義同

昔齊騶馬繻以胡公入於貝水解騶馬繻齊大夫也胡公齊大

公玄孫之子胡公靖也貝水名胡公虐馬繻馬繻弑胡公內之
貝水

陳氏奐曰騶馬卽趣馬齊騶馬繻猶下言魯圉人犖耳騶馬
圉人皆官名月令季秋天子命僕及七騶咸駕鄭注云七騶
謂趣馬主爲諸官駕說者也趣與騶同周官趣馬下士阜一
人徒一人鄭注云趣馬趣養馬者也韋注失之

史記齊世家大公子丁公伋丁公子乙公得乙公子癸公慈
母癸公子哀公不辰周烹哀公而立其弟靜是爲胡公漢書

古人人表同然則胡公是大公玄孫也之子二字疑衍

水經穀水

注臨淄人發古墓得桐棺前和外隱起爲隸字言齊太公六
代孫胡公之棺也與此注合韋蓋據世本未可以爲衍文

世家又云哀公同母少弟山怨胡公乃與其黨率營邱人

襲攻殺胡公而自立索隱引宋忠曰其黨周馬繻人將胡公

於貝水殺之

周字疑誤

遠孫案貝當作具字之誤也水經巨洋水

出朱虛縣泰山酈注巨洋水卽國語所謂具水矣袁宏謂之
巨昧王韶之以爲巨蔑亦或曰胸瀾皆一水也而廣其目焉

皇清經解續編卷六百四十六終

長沙王善化劉

賓校鐸

皇清經解續編卷六百四十七

南菁書院

國語發正十九

錢唐汪遠孫小米著

吳語

越王句踐解句踐祝融之後允常之子芊姓也鄭語曰芊姓夔

越世本亦云越芊姓也

世本見漢書地理志臣瓚注

史記越世家越王句踐其先禹之苗裔而夏后帝少康之庶子也正義引吳越春秋云禹周行天下還歸大越登茅山以朝四方羣臣封有功爵有德崩而葬焉至少康恐禹迹宗廟祭祀之絕乃封其庶子於越號曰無餘韋從世本以越爲芊姓者徒据鄭語之文不知鄭語夔越皆謂楚之別封楚世家熊渠立少子執疵爲越章王夔越之越卽越章也句踐當是